



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Wangchuk mechiok tashi KDA-i
Centre den sensak masemtsü

Dinesh Karthik Sharjah
Warriorz nung denogo



VOL. XXII ISSUE NO. 348 (ADOK 348) DIMAPUR RASEMNÜ (WEDNESDAY) MONGPUTENI (OCTOBER) 01, 2025 ₹ 5.00

Non-Naga Indigenous Tribes dendaktsütsüla: RPP

Dimapur, September 30, 2025 (TYO): State sorkari "Open Rally" ajanga police constables 1176 shimoktsü mapa inyakba atema tenügsang agütsür saka iba nung Non-Naga Indigenous Tribes madenba atema temulung raksar ta Rising People's Party (RPP)-i metetdaksüogo. September 30, 2025 nü recruitment notification nung Nagaland nung Indigenous Naga Tribes atema dang shia lir aser

Non-Naga Indigenous Tribes medendaktsüba ajanga Nagaland nung policy yanglurtem tenüng menüker ta RPP-i ashi.

Nagaland nung Non-Naga Indigenous Inhabitants ya Backward Quota nung adentsü langa lir. Anungji state sorkari nübo teimba dak rangloker mapa inyakdang non-Naga tribal minorities nem timtem magütsütsüla ta RPP-isa metetdaksü.

W/C Co-Convener'er ki anasa injang khatokba aitsür

Dimapur, September 30, 2025 (TYO): September 28, 2025 aonung 6:30 ako meta GPRN/ NSCN (Kitovi) züngsemtemi W/ C Co-Convener Ino. Kiviho Zhimomi'er ki anasa injang khatokba aitsür ta W/C, NNPG-i metetdaksüogo.

Maj. Gen. Hinoto Yepthomi lenisüba kübok telok kati iba mapa inyak aser injang khatokba sülen ang amokmerenba manener ta parnoki ashi.

Tanüngba Naga nungertemi Naga political Groups aser sendaktepa aliba Naga nunger ajak sabang ka nung anidentsü merangdang ibala inyakyim ajanga mapa tamakok mengudaktsütsüla ta Media Cell sangdong ka nung ashi.

Yimjung bener arutsü aser

putepshitsü atema kanga meranga inyakba mapa raksatsütsü merangba ya magizüktsüla aser yimjung aginüba senso ajaki aitsütsü tim. Telok ka mesüra lennir kati pa taginüba atongtsü mechi nung ozüng alema inyaksangshiba, amokmerenba aser merenshiba ajanga Naga nunger maziüoktettsü ta angatettsüla.

Ozüng alema inyaksangshi anentsü aser yimjung asoshi lenmang lapoktsüba atema tatok agütsüteptsü aser longjemtsü nüngdak. Anungji W/C-i Naga political groups ajak dang aziüoka alitsü aser olemtep ajanga mangatettep aliba onüktem angatetteptsü mepishir ta Media Cell sangdong nungsa metetdaksüogo.

Dept. of Parliamentary Affairs-i CM tem kaket ka saya



Dimapur, September 30, 2025 (TYO): September 30, 2025 nü Power and Parliamentary Affairs, Minister K. G Kenye-i 'The Leadership Legacy: A profile of the Chief Ministers of Nagaland' kaket sayatsüogo.

Iba kaket ya Department of Parliamentary Affairs ajanga adoker.

Department-i asen Chief Minister tem taküm aser mapa tushia iba kaket adokba atema

tenügsang agütsür ta Kenye-i ashi. Iba ajanga Nagaland yimtenren wadang nung lenisüba, telongjem aser akangakanga noktakba zülua lir, ta pai ashi.

Indian Constitution nung Article 371 (A) nung asen sobaliba aser inyaksangshi lateta aliba nung ajemdaker nübertem dak rangloker policy balala indang zülusema lir ta Minister Kenye-isa shisem.

Nagaland nung Oct 3 tashi tsügsang majungtsü

Dimapur, September 30, 2025 (TYO): Nagaland State Disaster Management Authority (NSDMA)-i October 3 tashi Nagaland nung tsüngmok aser tsüngi aiba den tzünglu terara arutsü osang metetdaksüogo.

Kohima, Kiphire, Chümoukedima, Dimapur, Niuland, aser Tuensang district tem nung tzünglu arutsü ta akok NSDMA-i ashi.

Tenemlen tzünglu aruba ajanga Dimapur, Niuland, Chümoukedima, Bhandari, Baghty, Tizit, aser Tuli amala lendenlen tzü atzüngdenba aser tzümetsüng timtem ajurutsü akok ta NSDMA-isa metetdaksüogo.

NSDMA-isa District Disaster Management Authorities (DDMAs) aser line departments ajak renema atatsü tetuyuba agütsüogo.

Nagaland Police nung General Duty constables 1,176 anioktsü: DGP



September 30, 2025 nü Police Headquarters, Kohima nung Director General of Police (DGP) Rupin Sharma den ketdangsürtemi osangbener den jembidang agiba noksa ka angur.

Kohima, September 30, 2025 (TYO): Director General of Police (DGP) Rupin Sharma-i Mongulbarnü Nagaland Police nung recruitment drives tulutiba rongnung ka agitsü osang metetdaksüogo.

Tanü DGP Rupin-i General Duty constables mapa 1,176 nung nübo shimoktsü osang lemsatep. Departments, agencies, asr kin teloktem den asüngdangtepba sülen küm talangka recruitment process magii aruba agitsü ta pai ashi.

"Hao, iba asoshi mapang agiogo saka sorkari upper age limit 38 years salatsüogo aser iba ya mapang menuba mesüra COVID-19 wara atema maongka agütsür" ta pai ashi.

Tang mezüng atema application process ya online nung dang agitsü aser police office tem nung physical forms kecha magizüktsü. Tejangrartemi October 6 (anügdang 12) aser November 7 tashi nung tenüng agütsütsü akok.

Iba maparen nung self-application aser assisted-application modes dena lir aser tarutsü nung recruitment cycles tezübaba akümtsü atema one-time registration (OTR) lir ta DGP Rupin-isa ashi.

Ketdangsürtemi recruitment indang maparen ya küm ka tema inyaka aruogo aser terata malitsü atema akokba tashi teinoktsü ajak enokogo ta paisa ashi.

Tenüng agütsür ajaki eligibility criteria kanga junga azüngtsü aser nüngdakba kulikakettem renemba sülen ang form fill up asütsü mepishir ta Rupin-isa ashi.

Nagaland Police-i taruba ita 5-6 tsüngda ano recruitment maparen ka inyaksü sentong atongdar aser idangjia mapa 1,200 shi atema asütsü akok ta DGP-isa metetdaksüogo.

"Asenok training capacity ji 1,000 shi alir saka tang onoki 1,200 trainees atema inyakdar" ta paisa ashi.

Constable ajak Indian Reserve Battalions (IRB) nung anioktsü aser parnok yaser tanga kongsangtemi yoktsü akok. Recruitment maparen nung physical, medical, aser drug-use tests alitsü aser nisung kar danga opioids amshiba putetra mesüra physical criteria nung tamakok ngura disqualify asütsü ta DGP Rupin Sharma-isa ashi.

Iba maparen nung ochimashi, süpokrem mesüra political meinprong malitsü atema public-i amalitepa yariteptsü mepishir ta

paisa ashi.

Paisa examination format indang olen ka ashidang tan recruitment mapang written test nung OMR sheets mamshitsü. Lower educational qualifications pur nem maongka agütsütsü kechiyong minimum eligibility ji backward tribes atema Class 6 aser tangar atema Class 8 lir ta ashi.

2011 Census nung ajemdaker cabinet-approved tribal ratios ama kin balala nem menden lezmüktsütsü aser iba recruitment ya "indigenous Nagas only" atema dang lir ta Rupin Sharma-isa nenshiogo.

Garó, Kachari, Mikhir, aser Kuki nunger atema koda ta osangbeneri asüngdangdang "government notification nung aliba ama parnok reserved seats khen sota atar" ta DGP-i langzü.

"Parnoki tang aply mesütettsü saka sorkari parnok tebilemstütem angatettepba sülen parnok nem-a lezmüktsütsü. Parnok lezmükba menden nung tangar manioktsü aser balaka yutsütsü" ta paisa metetdaksü.

Tang recruitment drive nung 2022 nung okadaki agenba police recruitments 935 maden. Iba ken o ya High Court nung benoka lir ta Rupin-isa ashi.

Taoba mapang December 1963 matongdang Nagaland nung alir non-Nagas shimok saka tangbo parnok madener ta paisa shisem.

"Iba ya sorkar lemtet aser iba nung ni kecha balaka mashir" ta Rupin-isa ashi.

Nagaland nung population-police ratio teimtiba lir aser tang police 25000 tema lir ajisüaka asenok sanctioned limits kübok lir ta paisa jangjashitsü.

Chümoukedima nung Child Rights & Child Protection sentong ka agi

Dimapur, September 30, 2025 (TYO): Nagaland State Commission for Protection of Child Rights (NSCPCR)-i District Child Protection Unit, Chümoukedima den yaritepa September 30, 2025 nü "Child Rights & Child Protection" atema One-day Awareness programme ayonga agiogo.

"Chumoukedima District-i arua tebilemstütem lemsatepba atema Commission dang kanga pelar" ta Chümoukedima Deputy Commissioner Polan John, NCS-i ashi.

"Tanurtem temetentem osang prokshiba ya kanga tongtipang aser asenoki asen chirnurtem anepalunüra asenoki parnok kümzüka ayutsüla. Asen loktiliba nung tanur anepaluba aser tanur temetentem anema inyakba ya kija shiai meteta alitsüla" ta Chümoukedima DC-i ashi.

Dimapur aser Chümoukedima nung tanur dak tim masüba inyakba tebilemstü kanga ajurur. Tanurtem kümzüka ayutsü ya kanga tongtipang ta

angateta sorkari Juvenile board members dang masü saka commission members dena shima mapa inyakdaksür ta paisa ashi.

Sorkari national level aser State ajak nung Commission tentetogo aser iba ajanga DCP, District administration, CWC, aser Police den osang metetpelatepa inyaksangshir ta Polan-isa ashi.

"Tanurtem ya linük atema tongtired lir aser parnok ya state mesüra linük ka renloka aotsü atema kanga tongtipang" ta NSCPCR Chairman Alun Hangsing-i ashi.

Tanurtem health, education aser safety atema temetentem lir aser ozüng, policy aser loktii maparen ajanga asenoki parnok kümzüka ayutsüla ta paisa ashi.

2013 nung Nagaland-i iba Act agizük saka ozüng aser policy memeteba agi tanü tashi tanur tem dak ozüng alema mapa inyaker. Asen tarutsü tajung südaktsünüra asenok ajaki tanurtem kümzüka ayutsüla ta

Hangsing-isa ashi.

Technology ainba ajanga tanü social networks ajanga tanur temetentem prokshir. Technology amshia asenoki tanur kümzüka ayutsü osang metetdaksütsüla, tanurtem asoshi safe websites yanglutsüla aser data analytics amshiba ajanga osang prokshitsüla ta paisa metetdaksü.

Iba sentong nung Legal Consultant Lichani Murry-i "Overview on the Juvenile Justice (Care & Protection of children) Act"; NSCPCR Member Aying Wangsha-i "Rights of children about Education vis-a - vis Right to Education (RTE)" aser NSCPCR Member Akumla Longchari-i "Understanding and Strengthening the POCSO Act: Towards a safer Future for Children" onüktem jembla liasü.

Sentong nungsa DCPO, Chümoukedima Nikito Zhimomi-i district nung tanur dak sendakba ken o tem osang tatsüka lemsatep.

Peren nung moko indang seminar ka ayongzük



Peren nung moko ajanga timtem agütsüba seminar ka September 29, 2025 nü ayongzuka agidang tangokba noksa ka yangi angur.

Dimapur, Rongjui/Sept. 30 (TYO): National Tobacco Control Programme Peren ajanga DEF, Peren aser DMHP Peren den lungjemer September 29, 2025 nü "The Ill Effects of Tobacco Consumption and COTPA 2003" indang seminar ka ayongzuka liasü.

Igwangheing Hemang, NPS, Superintendent of Police, Peren ajanga iba sentong nung o tatsüka jembidang, moko amshiba aser mental health dak sendakba nung tekeraba nung anepalu asütsü ajungshia liasü.

Neilasenuo, Clinical Psychologist ajanga Mental Health indang jembidang, tekolok

anema alitsü ya asen temang anema alitsü nüngdakba ama tongtipang lir, ta ashi. Lai OPD nung parnoki services agütsüba aser TELE-MANAS indanga rateta ashi.

Dr. Ao Yanger, DNO, NTCP, Peren ajanga iba seminar omen "The ill Effects of Tobacco Consumption and COPTA 2003" nung ajemdaker jembidang smokeless chewing tobacco (SLT) ajanga lanurtem dak kongshiba indang rateta ashi aser iba ya lokti nung yimya ka ama agizuka amshir, ta ashi.

Paisa oral cancer timba akumba aser tain dak kisung masü lanurtem dak iba tashidak

putetba indanga shia liasü.

Oral cancer ya moko achiba ajanga tali adokdaksür ta pai ashi aser iba sentong nung shilem agirtem dang parnoki agütsüba service agia tekeraba nung anepalutsü ayongzuka liasü.

Neivinuo, Psychologist, NTCP ajanga district nung inyakyim balala agiba indang tongmelang agi lemsatapa liasü. Iba sentong nung Hoinichin, Social Worker, NTCP menden liasü, Dr. Hiazuheing Ndong, Pastor, Police Baptist Church, Peren ajanga sentong tenzuka sarasadem aser "Say no to tobacco" pledge agia sentong tembang.

Agri Expo Chümoukedima nung Ahibi Fest ayongzüksü

Dimapur, Rongjui/Sept. 30 (TYO): Ahibi Fest ya Nagaland indang kentenba aser sobaliba benjong ka lir, koba October 17, 2025 nü Agri Expo, Chümoukedima nung ayongzüksü.

Dimapur nung Mongulbarnü osangbener den jembidang, iba sentong ayonger temi Ahibi Fest ya concert kisung masü saka region sempet balala asoshi apu

latsütsüsa yangluba kentenba aser sobaliba benjong ka lir, ta ashi.

Iba benjong nung nüngtugu kentener Iyaz-i shilem agitsü, shibai Replay aser Solo amala ken atenba alima tesem ajunga nung kanga junga agizükteta global streams 1.7 billion dak tema lir. Ano Arunachal Pradesh nungi Indian hip-hop ken atener nüngtugu rapper Sono Lem-ia

shilem agitsü.

Nagaland nungia Lenen Jamir, Hentok Konyak, Keneisenuo Sorhie, Moko Koza, Kivika Assumi, DJ Lil Bomb, Sunep Lemtur aser Aseno Metha nungeria shilem agitsü.

Iba Fest nungya chiyongtsü tabu balala angutsü aser entrepreneurs tem asoshi parnoki yanglutetba sayutsü asoshia maongka angutsü.

Department of SCERT ajanga metetdaksür

Dimapur, Rongjui/Sept. 30 (TYO): Sorkar ajanga sangdong agütsüba ama SCERT Nagaland ajanga private schools ajunga atema Academic year 2026 atema Nagaland Heritage Studies Textbooks Classes 1-8 aser Nagaland Heritage Studies Textbooks (Alternative English) Classes 5-8 alizüksü

lir.

Anungji Nagaland Heritage Studies (NHS) Textbooks amshitsü mulunga aliba Private Schools tem dang indang-indanga Publisher dang masü saka SCERT ajanga Google Form Link: <https://forms.gle/szi936wJ6wVjiVNt7> nung pei nüngdakba meshitsü metetdaksür, ta SCERT

sangdong ajanga ashi.

Iba advertisement ya Department indang website <https://scert.nagaland.gov.in/> nunga agütsütsü.

Order ya October 31, 2025 tashinung agütsütsüla aser iba dak sendakba nung tali tejangjaba metettsü asoshi 8014893515 nung tongteprateptsü akok, ta sangdong ajangasa ashi.



17th Sept nungi tenzuka tang ya India lima ajunga nung tetsür aser tanurtem anema alitsü asoshi 'Swasth Nari Sashakt Parivar Abhiyaan (SNSPA)' ta sür health camp sentong ka agia arur. Kasa sentongji Sapangya Primary Health Centre nunga ayonga Sapangya nung alirtem den temeket yimtsüing - Chungtia, Aliba, Kinunger aser Longjongkong nungi patient 54 temang reprangba den tetendangba balala agia angati mozü agütsü. SMO, Dr. Temsumenla Longkumer, M.O, Dr. Maongtula, M.O, Dr. Akum aser department nungi staff-temi yaritepa iba health camp sentong takok ngua kaogo. Tanep iba sentong tenzükba tongmelang ka agidang, Chungtia Village Council Chairman, Assamwati-i tepela o lemsatap, staff nurse Amenla-i anemia tashitak indang tatsüka rasa-a ashi aser Rev. L. Meren den temoatsü meshia sarasadem. Mokokchung 27th September, 2025

East Dimapur Town Council ajanga Puja salem lemsatap

Dimapur, Rongjui/Sept. 30 (TYO): East Dimapur Town Council ajanga nübur ajunga dangi Puja benjong salem abener, ta East Dimapur Town Council indang Executive Officer, Zakabo V Rotokha-i sangdong ka ajanga ashi.

Iba benjong ajanga nisung ajak dangi tepela, tesunep aser yimchiyimjung bener arujang ta moatsür. Iba benjong amungba mapang nüburtem aser Puja committees tem dang tangatetba tajung nung iba

benjong amungtsü ayongzük, ta sangdong ajanga ashi.

Benjong tepiyong ajaki mürekmejua amungtsü asen teinyaktsü lir, anungji tamanger, benjong ayonger aser nüburtem dang asen jila müreka ayuba nung amalitepa jana bendentsü asoshi tesem shimteta aliba amshitsü ayongzük. Asenok ajak külemi iba Puja ya tepela benjong kisung masü saka libajen apayua amungtsü ayongzük, ta EDTC sangdong ajangasa ashi.

Longkong HWC-i NQAS certification angu



Dimapur, Rongjui/Sept. 30 (TYO): District Health Society Mokokchung asoshi konang tetushi tulu bener aruja, Longkong HWC ajanga National Quality Assurance Standards (NQAS) Certification nguogo.

NQAS ya health care services atema criteria balala agüja aliba ama inyaktetba public health facilities nem agütsür.

Empanelled external assessors temi August 30, 2025 nü NQAS asoshi Longkong HWC ya External Assessment agia liasü aser iba kulizüing kakat ya angu.

Iba takok ya health care staff, ASHAs, stakeholders aser HCMC ajanga bendanga agütsür meranga inyakba yong lir, ta Chief Medical Officer, Mokokchung sangdong ka ajanga ashi.

Kohima DLSA-i Aadhaar registration drive tenzuka lir

Dimapur, Rongjui/Sept. 30 (TYO): Kohima District Legal Services Authority (DLSA) ajanga SAATHI kübok anogo ana Special Aadhaar Registration Drive tenzükogo, koba Neiko Akami, Member-Secretary, Nagaland State Legal Services Authority ajanga District Court Complex, Kohima nung September 30, 2025 nü tenzükja liasü.

Pai iba sentong nung jembidang SAATHI campaign (Identity and Dignity) ya National Legal Services Authority indang sentong ka lir ta ashi.

Makamait tia nung aliba tanurtem nem Aadhaar card ama 'legal identities' agütsütsü aser parnok ya shisaluyim, healthcare aser welfare schemes balala den sendakteptsü nükkidong nung iba campaign ya 2025 küm tenzük, ta ashi.

Pai Kohima DLSA dang Tseminyu-a ayimjemtsü ajungshi aser iba campaign ajanga timtem nung alirtem angati ajangzükdaksütsü ashi.

Taküm April ita Nagaland State Legal Services Authority ajanga Mega Legal Camp

ayongzükba sülen nübur ajangzüksü asoshi special drive agia aruba nung Aadhaar registration atema nüburtem nungi telangzüba tajung agütsür, ta pai ashi.


Deputy Commissioner, Kohima, B. Henok Buchem-ia iba sentong nung jembidang, CMHIS ama sorkar teyari balala agitsü atema Aadhaar cards ya kanga tongtipang lir ta ashi.

Pai iba sentong nung adener dang iba registration drive indang maongka agitsü ayongzük aser KDLSA dang nüburtem nem pei temeden indang metetdaksütsü atema kisung masü saka nübur teinyaktsü indanga angateta legal awareness sentongtem ayongzüksü ajungshia liasü.

Iba sentong nung Mezivolu T. Therieh, Principal District and Sessions Judge & Chairperson, Kohima DLSA ajanga pela agizükba o jembidang Aadhar amshiyim indang rateta ashi.

Sentong nung Nagali Shohe, Panel Lawyer, Kohima DLSA menden liasü aser mezüing anogo nisung 220 shi arua iba service agia liasü.

Bihar nung voter list tatembangbuba sangdongogo



New Delhi, Rongjui/September 30 (Agencies): Election Commission of India (EC)-i Bihar nung October-November ita assembly election magi tsüngda Mongolbarnü tatembangbuba voter rolls sangdongogo.

Ita asem tejakdang Special Intensive Revision (SIR) tenzükba sülen tatembangbuba voters list nung voter lakh 48 tenüng mali.

"SIR sülen tatembangbuba electoral roll September 30 nü sayaogo. Voter temi parnok tenüng iba link; voters.eci.gov.in ajanga reprangtetsü," ta ketdangsür kati ashi.

EC weblink ajanga option tongtimbang ana agütsüogo, kaji roll nung pei tenüng bushitsü mesüra assembly segment-wise rolls download asütsü asoshi asütsü.

SIR nung shilem ka ama

August 1 nü draft ka sangdong, saka iba ya September 1 nü tashi metongshitsü atema lapokja liasü.

Voter list tatembangbuba nung voter 7.42 crore lir. SIR metenzük tsüngda 2025 küm June ita tashi nung voter crore 7.89 liasü, saka tang voter tem asüba, talidak melenshiba aser duplicate entries tem ajak agi lakh 65 aginogo. August 1 nü draft SIR list nung crore 7.24 liasü. Iba sülen ano list nungi lakh 3.66 aginogo aser tenüng lakh 21.53 bendenloko.

Tenüng intokba (65 lakh + 3.66 lakh = 68.66 lakh) aser bendenlokba (21.53 lakh) ajak inyaktepba sülen September 30 nü tashi nung tatembangbuba elector ji crore 7.42 lir.

EC-i ashiba agi, temsüa alirtem kari danga electoral roll nung züngoksemtsü atema apply sünüa lira parnoki taruba election atema nominations file

asütsü asoshi tatembangbuba anogo matong dang anogo 10 jelia benoktsüla.

Election inyakyim October ita tom nung tenzüksü imlar aser election mezüngbuba shilem ita tatemi mesüra November ita tetenzüklen agitsü akok.

Maneni nisung kari danga electoral roll tatembangbuba dak temulung mesüra parnoki Representation of People Act 1950 kübok Section 24 dak ajemdaker district magistrate nem mezüngbuba temepeshiba agütsütettsü aser tanabuba temepeshiba state indang chief electoral officer nem agütsütettsü.

Commission-i Bihar assembly election anogo hopta ka tsüngda sangdongtsü imlar. Election mezüngbuba shilem ya October tatemlen Chhath Puja sülen agitsü imlar, koba October 25 nungi 28 tashi agitsü.

Wangchuk mechiok tashi KDA-i Centre den sensak masemtsü

New Delhi, Rongjui/September 30 (Agencies): Kargil Democratic Alliance (KDA)-i Mongolbarnü ashiba agi, climate activist Sonam Wangchuk aser Leh nung apurtem mechiok tashi parnoki Centre den sensaksem nung shilem magitsü. KDA-isa, Leh nung nüburtem dak injang khaloktsüba ken o ya judiciary nem bushisüngdangdaksütsü takhangba ka agütsüogo.

Osangbenertem den sensaksemba mapang KDA co-chairman Asgar Ali Karbalai-i, September 24 nü shibanger aliba mapang security force temi injang khaloktsüba ken o atema judicial inquiry ka khangogo.

KDA ya Kargil nungi lenirtem lokti tentet ka lir aser parnok den Apex Body Leh na tang iba Union Territory statehood atema Centre den sensaksemba mapang ka lir.

"Onoki Apex Body Leh den tongtepratepa arudar. Sonam Wangchuk mechiok



Sonam Wangchuk

tashi, nisung apuba manen tashi, pur alirtem mechiok tashi aser judicial probe ka asoshi tetuyuba magütsü tashi Centre den sensaksem nung onoki shilem magitsü," ta Karbalai-i ashiba PTI sangdong ka ajanga metetdaksü.

"KDA-i, UT administration aser MHA nati aitsüba magizüker aser Sonam Wangchuk shiba linük indang hero ka lir pa tangsa tang chioktsüla ta shiner," ta Karbalai-i ashi.

Paisa, Ladakh nung alirtem dang nisung kari linük anemertem ta ajaba aitsüogo. "Onoki India sorkar dang ya

shiner, onoki shinga atema certificate ka menügdaker. Onoki linük atema onok taküm bendanga agütsüogo. Lakah nungertem linük anemertem ama ojang dang benshiang," ta pai ashi.

Ladakh MP Mohmad Haneefa-ia, local tem parnok anema tenüng tamajung amshiba atema kanga tezüadanger ta ashi.

Hombarü Apex Body Leh-i, police temi nüburtem dak injang khaloktsüba atema judicial inquiry ka mebenok tashi aser Wangchuk densema activist tem ajak terakdakba kecha makai mechiok tashi Centre den sensak masemtsü ta sangdongogo.

September 24 nü longkak aitertem aser sepaitem tsüngda mangatettep adokba sülen nisung pezü tepset aser nisung 50 dak tema pua liasü.

Activist Sonam Wangchuk, shibai anir longkak aita liasü, pa-a NSA kübok apu aser Rajasthan kübok Jodhpur nung tepuokdak yua lir.

Bareilly Police-i 'I love Muhammad' campaign nung aija alir ka puogo

New Delhi, Rongjui/September 30 (Agencies): Bareilly district nung "I love Muhammad" campaign maziükteti mepetmesü tulu akümba sülen Bareilly Police-i Mongolbarnü aija alirtem rongnung tongtimbang nisung ka puogo. Aija alisang ya Tazim ta jangjaogo.

SP city Manush Pareek-i ashiba agi, police temi pa aputsü merangba mapang Tanzim yagi police dak injang khalokja liasü. Paisa, iba ken o nung ajak senteper nisung 72 puogo.

"Ken o dak sendakba nung tanü tashi nung nisung 72 puogo. Ken o nung Tazim densema aliba indang osang onok ket nung lir. Pa ya nashi jang shibelener ka lir. Pa Gangster Act kübok tepuokdaki iogo. Police temi pa aputsü merangba mapang pai police dak injang khaloktsü," ta Pareek-i ashi.

"Pa puogo aser pa ket nungi country-made prangbong ka ngutetogo. Apurtem rongnung karbo yimti nung alirtem masü tangalen alirtem lir," ta pai ashi.

Police superintendent-isa, September 26 nü mepetmesü dak sendakba nung FIR 10 benoka lir, ta ashi.

Uttar Pradesh police-isa, September 26 nü Bareilly nung longkak aitba dak sendakba nung Maulana Mohsin Raza puogo.

"Maulana Tauqeer den külemi pa nem teyari agütsürtem aika kuli balala dak ajemdaker tepuokdaki yokogo. Bengal aser Bihar nungia nisungtem pua tepuokdaki yokogo. Iba ya jelia sentong yanglur inyakba lir aser kuli ama poster, banner amala bendenogo," ta DIG Sahni-i ANI dang ashi.

Mohsin ya Maulana Tauqeer Raza den sendaktepa lir, shiba temalen puogo aser judicial custody nung yua lir.

Local administration-ia Mohsin Raza apuba sülen pa indang kiojen bulldozer amshia raksatsüogo. Cleric Tauqeer Raza indang kiojena 8 tashi bentsüogo.

Bareilly ketdangsürtemisa Ittehad-e-Millat Council chief cleric Tauqeer Raza Khan den sendaka alirtem indang ki o jen ti tashi jangjaogo, ta ketdangsürtemi Mongolbarnü metetdaksü.

Bareilly Development Authority (BDA) aser district administration nungi team temi Faiq Enclave, Jagatpur nung meita aoba sentong ayongzüka agia liasü.

Item ki o jentem ya temelaba makai yanglu aser karbo sorkar ali atsünga yanglua aliba ngutetogo.

Police-isa, Faiq Enclave ya küm tem tsüngda ozüng alema inyaksangshirtem jenokdak kümogo, ta ashi.

Vijay-i Karur nung nisung aika ajemsetba indang jembi

New Delhi, Rongjui/September 30 (Agencies): Karur, Tamil Nadu nung Tamilaga Vettri Kazhagam (TVK) tekolakba Vijay indang political rally ka nung lendong tulu atalokba sülen anogo asem lir pai mezüngbuba video osang ka lemsatepogo, aser pa mang ayimba lemsatepba den lendong nung akoksar kinungertem pai ajurutsü ta tenangzükba agütsü.

Actor aliba nungi yimden yimsüsür akümsang yagi par party worker tem tepuküma jembiogo, shirnok iba lendong dak sendakba nung temzüng ozüng kübok aitsür lir. Pai ashiba agi, parnoki rally nung kecha tai minyak. TVK-i state kübok tanga tesem nunga iba amala sentong ayongzüka agir, saka kechiba Karur nung dang iba lendong ya atalok, ta pai asüngdang.

"Ni temulung kanga koremer. Kechiba nüburtemi iba tour nung onok reprangi arur? kuli ka dang lir: parnoki onok kanga meimer. Parnoki kü dang temeim sayuba maoteti lir, ibayongji iba tour nung ajak dak alia ni nüburtem tekümzükba kübok toktsütsü atema tongtibannga jenjang agiogo," ta Vijay-i video osang nung ashi.

Lendong nung akoksar alir kinungertem kanga timtem nung

lir ta shia pai, "mangyim jashi nung aliba mapang ni asür kinunger ajak den asükhu lemsateper, shirnok temeimbatem samaogo. Ni ashiba o kecha agia iba ya meküpdangtetsü ta ni meteta lir. Mozüki nung temang anepalua alirtema takaratiba nung taneptsü angutsü sarasadema atar. Ni yakta parnok den ajuruteptsü," ta ashi.

Karur nung lendong tulu atalokba atema DMK-i Vijay kanga mejungi aitsüba mapang ka nung pai iba video osang lemsatepogo.

Yimden yimsüsüba tsütsü miim sentong kar alitsü ako ta shia Vijay-i, "onok campaign atema district pongui ogo. Iba amala mesükba kecha matalok. Ajisüaka kechiba iba ya Karur nung atalok. Iba ya kodaser ataloker? nüburtemi ochiji meteta lir. Nüburtemi ajak reprangdar," ta ashi.

Karur police-i party tekolakba dak alaka TVK ketdangsürtem anema ken o ka benokogo.

Ketdangsürtem rongnung State General Secretary Bussy Anand, Deputy General Secretary G.R. Nirmal Kumar, aser Karur West District Secretary Mathiyalagan nunger densema lir.



TIR YIMYIM YIMOBILEM (EDITRIAL)

DIMAPUR WEDNESDAY, OCTOBER (MONGPUTENI) 01, 2025

Tantsür-tamburtemi anir !

Tanü October mezüing anogo ya alima ajunga nung United Nations-i amongtsü ayongzükbä tantsür-tamburtem anogo, International Day of Older Persons, lir. Taküm 2025 küm iba anogomong omen ya 'Tantsür-Tamburtemi dang alima anir : Onok Tejangraba, Onok Junga Aliba , Onok Temeten," "Older Persons Driving Local and Global Action: Our Aspirations, Our Well-Being, Our Rights,"ta shimteta lir. Atangji, iba omen yagi tanü putu nung tantsür tamburtem ya akhi taoba putu nung alir tantsür tamburtem ama masü, saka parnok yabo teyari aginürtem masü saka teyari agütsünertem lir. Ibayongji, arshi küm azüngtsübo , küm 60 aser 70 tema, tantsür-tamburtem asütsüa akok saka tereprangtsü nungbo küm 40 mesüra 50 atura nisung amai aser mapa nunga yamaji tekümdang aser teyakyak purtem lir. Aji oda, tantsür tambur ta ajatsüla masü , kechiyong küm 80 aser 90 tema purtemi gari anir jajar, peisasa shishilembadaki aoer aser mapa inyaker. Ano, tantsür tamburtem aika tenüktelen shitak, temulung tazüing, poknüngbokra nung kecha timtem mali, temang pongbapongbar, yimten, lokti aser arogo nung angati nübo aser rongsen tenla tulu agüja inyakba angur. Item purtem dangji tantsür tambur ta ajatsü mapet, kechiyong tantsür tambur ta asüdang, asenok temulungjang tenük agibo peisasa kidanga jajaa moutet ajok amer, tenük tenarong tashimait kümer dang angur. Ibayongji, Senior Citizens mesüra Older Persons ta tangar oshi nung ajabaji asen oshi nung meyip dang tantsür tambur ta sünütsüka saka asenoki teintet rogo ta dang parbokji tanutsür aser tanubur kümja amshir, kechiyong nisung ka kibakiyimtsü mapang tongerbo, joko, ajak teintet rogo purtem lir ta ashitsüa akok. Aji oda, küm 60 ser tema purtem dang tantsür tambur ta ajatsü melen teintet rogo purtem dang ajaba jagi, atangji, tantsür tamburtem temang aser tokolok shisatsü ajak tashi itdaksür aser kechi meshitsü ta bilemtsü melen kechi agütsütsü (?) ta bilemdaksür. Iba jagi, tanü putu mapang tantsür tamburtem yabo teyaridaktsür masü aser tanidakertema masü saka tanishir aser teyarirtem lir. Parnokji alima aser anü tama angurtem aser tajung majung aika ajangshidangertem , anungji parnok dak tajangshiba aser temetetba aika lir aser rongsen nunga tanutsür tanuburtem dang nungibo parnoksa takarba lir. Iba tashi nung parnoki yimten nunga yimsü asür aser lokti aser arogo nunga lenisüba tajung agütsür. Aji oda, tanübo tantsür tamburtem ya kibong nunga aser lokti nunga khuret masü saka temoatsü aser teyari agütsürtem lir. Ibaji tanutsür aser tanupurtemi repringtettsüla aser parnok mezüingmeshi mesüi, parnok aliba agiang lanurtem taküm aser tenela nüngdak nguteta alir ta angateta parnok dang meima benshitsüla aser akümtsübu sayutsüla. Akhi mapang ama masü, tanü putu nung tantsür tambur mesüra teintet nisungtemi tanga taküm nüngdak aginer masü saka akhümtsübu aser temeim aginür, ibajibo sen agi alia agütsütsüba masü saka chirnur aser lanurtemi angati o tanep aser awashi ka agi agütsütettsü. Aji oda, tanü teintet rogo purtemia angatettsüba kaji , küm agi tantsür tambur kümerbo, temang junga liaka, ibai pei kisüing agitsü inyakba mapang masü saka tangar asoshi mapa tajung 'Voluntary service' agütsütsüba mapang lir ta angateta inyaksü junger. Iba jagi temang tajungba küma arshia alitsü mozü tajungtiba tepela aser tesünep angutsü.

OLEMSABANG

Teintet Rogotemji Hon

~ Mrs.R.Mapukala, Pongen.Rtd. Teacher, Merangmen Tzürangkong.

Alima ajaklen teintet rogo anogo;
Mongpu shia temungratsü sentong aika liaka,
Tanü amongba benjong yabo jangratemtsü ka.
Kichiaser anü talur aküm ka mesüka,
Leper nung tetsüing külen ajemaka yur,
Lia aruba akümüli anogo shilua shisadangba mapang.
Ibai asadangtsü makokba mapang ka masü no !
Meimchir arishi küm tenem sür metsü,
Arishi talang liaka lir anasü-ang;
Ajok agi len ania, teperem koktener,
Tetsüing agi temang makok, tejak atsürepa;
Lanuwa mapang, temba tenur shilua menungraba anogo.
Alilma kin telongjemi October itaji teintet rogo mung ta bangjem.
2007 küm ABAM-ia kesa ita mezüing October ta sangdong.
Kodaser parnok metushitsü aka! Ajaki iba mapang yongyaset.
Tanü lanu lachi ajak kenübo sentsü rema tantsür tambur akümtsü.
Saka teintet rogo dak tajangjem, temetetba shisatsü aika lir.
Alimaibo oset tejen ka ama bilemer, liwa-ogo ta mezüingmeshir.
Nai kichia meinyaktettsü, nai alima benjatsür;
Ajem-ajema liang ta telutsür.
Saka ina ! Oh, teintet akümket tsürabur tajungtem,
Nasa tetemjen samanir, takotet kenshi oshir.
Alimai kanga nüksüshir, apayuseter, asa taor takümttem.
Senti berem dang nungia nasa tajungtiba ani...

Taküm yipru zünger mezüingma nai atendanga jajaogo.
Shisapulu agi kokroka neneteter, koleniang meratsü ta;
Machi majem sensak tia atendanga jajatemer, anülü sentsü ama,
Tashi ajemer aniasa agi menepba asa taor taküm.
Saka temolungjang nung Kodak li penzüa tanela jenjang,
Kodak li nung kurang ka asoshi yongyaba arishir taküm.
Tashi-tawa-er dang nungi, koktener aliba asa-tao takumji sentiba.
Tajangjem, temetetba aika agi nü molung sünga rizünga lir.
Na aliyong lokti taküm alir, asüingdangya molu yinsem na.
Otsü olem-sobaliba lipoklisang shisa anetdak;
Na asa-war taküm aser shisatsütem meteni-ang,
Aibenbo tabensa leniba amajok akümer.
Ena ! Arishir takümttem, naia ya tenok-tenoka angangni...
Ni teraksatsür masütsü mapa aser o nung.
Ni-ang temetetba küma maparen nung tebang chioka mejembitsü.
Tangar libaliru ajak nung metong shitsütsü.
Ni ajangshia aruba tanen makai lepshia, tangar lakjokmaradaksüba,
Tebilemdang makai kümli adoka tangar meyrudaksütsü.
Ken-kenbo ni aibelenogo ta nangzüktettsü.
Tali aremzütsü, teebilemdang akatsü, temeim inyakttsü;
Ochi jembitsü, Sarasadem taküm den Tsüingrem temeim lemsatsü.
Merükmejo, aser sübosolem, tekülemi teti aotsü.
Ni kakat tajung ka ama tatishitsü taküm ka sudakjang ta Tsüingrem dang shidi.

Tanü teintet rogo alimai tushir, ya ne dak alang,
Tatsütsü süng-a süngjen tajungba ta jembir.
Taintemji hon ta jembir, taküm leman nung longzüka ta ashir.
Aou tashi agi lanu aküpa tangiter ta jembir.
Alimai nüksüshir ne senti taküm na maden kichi sütettsü !
Oh... arungni... lanuasensortem, tejen makemba oset kichia makaka.
Naro tebur tajungtema künübo remzüka oa-adoker.
Tanü aturar aikati teintet rogo mezüingmeshir.
Kümdangang ajaki iba mapang ya ajurulang-lang.
Asa-taortem leperi maidangsa parnok nungi shisatsü apu-ang.
Parnok den sensaksemang sobalibatem angazükang,
Tsüingremi akümlir teintet rogotem nem arishi talang moajangma. Amen.

TAMANG

(Iba ya DABA Tongtepratep Adok 156, January - July 2024 nung adokba ocet tazüingertem ajangzükdaksütsü bilema adoktsür).

(Yashi adok nungi...)

Asentenshi Tamang : Yisui ashi, "Nisung kati alima ajak ajangzüker pei taküm madokra pai kechi ajangzüksü, mesüra nisung kati pei taküm melena kechi agutsütsü" Mat. 16:26. Taküm nung asentenshi makara tamang nung tasüman den saku lir. Teinyaksü aika lir aser item ajak rongnung tangsa (aretepa) inyakttsüji pei taküm tashi-mait meteta tajungba küma-a melenshitsü mulungtetbaji kechi-a malizüktetba jenjang. Laishibai maneni ashir, "Na kechi nung tsük aji bilemtetang, temulung meyipang aser mezüing inyakba mapatem inyakang; Aji ota mesüra ni ne dangi arua milendong pei talidak nungi agientsü" J. Adok 2:5.

Tamang ajanga asentenshiji (Revival) nisung ka taküm nung adoker, alishi inyakyim ajak tazüingla kumer tanela temeshi tashi ajanga taküm rangpen melenshidaksür. Iba tamang ya alima inyakyim den khenyongi meyokteptsü makok, alimai jangraba maparen ama masü aser shilem agitsü makoktettsü, kechiyong shi tejangrabaji tanela anema lir Gal. 5:17. Kibuba dang ayimtenttsü mapang, aser kechi südir-süaka ni melenshitsüla ta pei tamang ajanga mulungtettsü nüngdak. Tangar teyari ajanga melenshibajia tongtipang, saka pei sasa mapang shidak nung melenshitsü mulungtettsü tongtipangba. Revival otsü nung tamangtir Dr. J. Edwin Orr-i ashi, 'Küm roker kechisarna inyaktetba dang nungibo ita terok tamang agi taküm ajonga bendanga agutsür asentenshi sentong nung tanela temeshii mulungba inyaktetbaji tuluba aser tongtipangba." Ali shi mulungba ajakji tanela anema aser tekümtet makaba teimaitsü sayur. Nisung yimya nung tangar melenshitsütsü asoshi tasa aika yanglur aser sentong jenti inyakdang, saka pei takümba kumzüba tejangja maka. Aiben taküm yanglushitsü mulungteteter aser shishia bilemaka melenshitsü mapang madoker. Küm jenti renteter, arishi anogotem asemjena omar joko mapang mali ta tebang agi jembia tokolok shisatsü nung yimdangibo arua aser kanga temulung shiranga aiter, saka pei menaba taitem tali-tali züiner aser tamang nung renema maliteti tamakoker küma-a lir.

Otem

Kibuba tsüingdangi motettsüsa aliba taitem-ji züingdanga iba temenen nangzükti, ashiko mapang tajung yamai dangbo malitsü, anogotem yakta omadoktsü, joko kecha jenjang makai teimla samadoktsü aser ammag arur züpa züpa meli-li. Amangli amangerbo tatem tonga amangdi.

Adianutem - Asükum shisatsü, ajemalu mesütetba yimyattem, kecha mali-ar kecha masütsü ta mezü-melemba shisatsü, tangar den toktepba tulu shisangba jakla, tajung dang tajung ta meshitetba yimya, nükmere jabujariba, memeshiba chiyongtsü achi-ajemba, ajak meteta kar ta sayu-nüba yimya, ni tama na tesü ta tekirak mulungsentsü atenba, item temenen yimya ajakji tamang agi koktettsü taküm tasen tenzüdi.

Iba Olemsabang nung lemsaba ken-o aser shisatsü ya iba ocet züluri bilema ken-o ama tazüingeri angateta agitsü mepishir

Indian Catholic magazine cover nung Charlie Kirk noksa inokba tatok meshi

Mumbai, Rongjui/Sept. 30 (Agencies): Indian Catholic magazine ka indang cover nung "Luminaries of Love & Leadership" rongnung America nunger right-wing political activist aser influencer asür Charlie Kirk noksa dena inokba asoshi tazünger temi aitsüba sülen tatok meshi.

Tazünger temi Bombay archdiocese indang küm 175 tain hopta shia adokba kaket, The Examiner nung Saint Mother Teresa aser tribal rights activist Father Stan Swamy nunger ama Catholic nunger mapa tajung inyaker den Kirk züngsemba asoshi ashishia liasü.

Tazünger temi ashishiba sülen September 25-October 3 adok nung tatok meshia liasü.

"Sept. 20-26 adok kaket tema meyibangba nung danga Catholic nunger den Charlie Kirk indang noksa inokba anema züluba shiti aika The Examiner-i nguogo," ta iba kaket zülur Father Joshan Leslie Rodrigues-i ashi.


"Tazünger temi angatetba shidak ta onoki agizüker aser iba ya ajanga parnok temulung nung betsaprongdakja lira, onoki tatok meshir," ta pai ashi.

Kirk ya September 10 nü Utah Valley University campus, United States nung kaketshirtem den jembiba mapang khaset.

Islam, tetsür-tebur telemsa aser tanur raksa indokba ken o nung pa tangatetba rasaa ashidang aiben mangatettep adoka liasü. Pa ya Yihuda nunger anemer ka lir ta tai tonglokja liasü.

Parnoki Kirk asüba tushitsü tebilemba masü mesüra temeshi nisung ka ama züngshitsü nükjidong nunga masü, ta Rodrigues-i ashi.

Iba magazine nung pa



indang article ya "Charlie Kirk - a polarizing figure - in life and death divided opinion" nüngja agütsür pai inyakba indang asadanga zülua liasü.

"Conservative Khristan tangatetba atema pai prokshia mapa inyakba kar shia lir," ta Rodrigues-i rasaa ashi.

Gujarat nungi Jesuit putir aser rights activist Father Cedric Prakash-ia Saint Mother Teresa aser Stan Swamy aser dangar yimya tajung aliba nisungtem den sako züngshia Kirk noksa cover nung amshiba ya magizükteter ta ashi.

Kirk tepsetba yagi aoksar aser jashir, saka pa ya Saint Mother Teresa den sako mamshitsüla, shibai makamait tia nung alina tanur anepalua tenzükbä nung takum bendanga agütsü, mesüra Swamy, shiba lisopur temeden wazüka

ayudang tepset, ta pai ashi.

"Shiba saint aser shiba kotak nung aliar asenoki tejangja memetet, saka asenoki temeshi langpang nung Judas metoktsür," ta Prakash-i ashi.

"Magazine ajanga mapa shidak inyaka tatok meshiogo," ta pai ashi. Mumbai nungi iba kaket azünger Dr Anthony de Sa-ia cover ya ngua pa aoksa aser jashi, ta ashi.

"Charlie Kirk-i 'Khristan' ta asüba ya na mesüra ni mesüra India mesüra Africa mesüra Asia nung aliba ama masü, pa atema chichiba Khristan ya sentsü temesüng nisung lir, shirnok dang pai 'Christendom' - Europe aser North America ta aja. Pa asoshi alima nung tamangba yimsü kechi südir süaka sentsü tanak aser temoro nisungtem ya jenjang tajemba liasü," ta Dr Anthony-i ashi.

Khristan telok kati Bangladesh azüdokshi aitsü

Dhaka, Rongjui/Sept. 30 (Agencies): Bangladesh southeast tsütsü Chattogram Hill Tracts (CHT) region nung tribal tsür ka dak tashiyim amshia shi nung medem ta tai tongloksüba sülen azüdokshiba Khristanpur telok balala meyokteper kumtetba Christian Conference of Asia (CCA) ajanga aitsüogo.

September 29 nü sangdong agütsüba nung iba mungdang indang tongti zülur Mathews George Chunakara-i meyongnem agüja lir, kong nisung asem khasetba, aika yirutsüba aser ki, shishilempaba tesem aser Khagrachari district nung 'indigenous ethnic minority communities' meyong tekülem ki tem amakba asoshi ochi obendang agütsütsü ayongzüka liasü.

Lisopur school azünger arishi küm 12 tain tetsür ka dak nisung telok kati tashiyim amshia shi nung medem ta tai tongloksüba anema September 28 nü longkak aitba mapang azüdokshia liasü.

"CCA ajanga Bangladesh

ketdangsür dang yimjung lidaktsütsü, timtem ajurur alir nem ochi obendang agütsütsü aser aibelener nem tapet temerenshi agütsütsü asoshi tekeraba nung mera agitsü ajungshir," ta Chunakara-i ashi.

Mepetmesü nungi ki o jen raksaja rongdoktsüba aser azüdokshiba ka akum, ta sangdong ajanga ashi.

Nisung asem ya security forces-i khasetba lir aser security forces züngsem densema nisung aika yiru.

"Tensa azüokba mapang security forces temi civilian anema tashiyim tali mamshitsüla," ta Chunakara-i ashi. Bangladesh Constitution nung ethnic minorities ya lisopur ka ama agizüka mali.

Lisopur dang "tribes", "minor races" aser "ethnic communities" ta ajaba aser züngshiba ajanga par temeden wazüka ayuba nung tetsükdaktsü tulu agütsür, ta iba mungdang ajanga ashi.

Parnok takum kumzüka ayuba aser par tetsü-tebou li nung

ali aser yangji aliba rongsen temeden tsütsü maneni timtem agüka bendanga amshir, ta sangdong ajanga ashi.

Yamaji lisopur tetsür tem tali yimya balala nung timtem ajurur. Bangladesh-i United Nations Declaration on the Rights of Indigenous Peoples (UNDRIP) mamshir aser sorkari official inyakyim nung lisopur (indigenous) tenüng mamshitsü kanga meranga inyaker, ta mungdang ajanga ashi.

Bangladesh nung yimjung yanglutsü, akang-jungshiteptsü aser nüburtem tiptema alitsü asoshi ethnic minority pur temeden wazüka ayutsü kanga tongtipang lir ta ashi.

Bangladesh nütsüng yongsük 170 million dak tema aliba nung Bengali Muslim nunger timba lir, kong nisung million asem shi ethnic minority telok 50 dak tema lir.

Ethnic minorities timba CHT nung alir aser ethnic kin timbai Buddhism, Hinduism aser Khristan yimsü amanger.

ANOGO ABEN TSÜNGREM DEN

Mapa inyaktsübaji lai tesayuba

Tang tesüngjem nung parnok mapa inyakang aser parnoki chiyungtsü chiyungang...

1 Tesalonikia 4: 12.


Tesalonikia nung aliba Khristantem aser tanü asen lima nung alirba nüburtemi mapa jenjangji angatettsüla. Asen Kibubai asen sasa yaritsü aser kibong yaritsü asoshi mapa inyaktsü tejangja shiogo. Mapa jagi asenok anishidaktsütsüla ta Pauli mashir. Pai asenok tashi dak alia inyaktsü indang mashir. Asen chiyungtsü angutsü asoshi asenoki inyaktsü Tsüngremi yanglu.'

Tasüngdangba tulu anüngdaka lir: Tanü lokti nungi nisung shia pei lenmang nung pei asoshi aatsü akok asü? Nisung shia aseni mapa koda agütsütsü? Mapa meinyakteter mesüra mapa mangurtem asoshi asenoki koda renemer?

Pauli Tesalonikia nung suki yangluba mapa inyak; aser iba jagi chiyungtsü ali. Yisui süng mapa angazük, aser tesülen tanga nung mapa inyak. Pai taidok aser teti taküm agütsüba ajanga asenok taküm akhüm ketdaktsü. Pai ajak nem mapa inyaktsü mapang tajung agüja takümüji akhüm keta lidaktsüner. Mapa meranga inyaka pei poksüng ngua alitsubaji Lai tesayuba nung amendaka lir.

In memory of Prof. Renthly Keitzar 25th Death Anniversary (1st Oct., 2025)

~ Lanu Atsongchanger



Alima nung sotetsang Renthysoba
Asür Nokinkabar jabaso
Anüng nung petinu medem
Kong ajaki metet.

Neburtemi na anünglak nung angur.
Ali nungi tzüpokdak medem
Nü shisa kodanga merusep.
Kaketji nü tembar tajungtiba liasü.
Solomon Chuba ama, ne ashimetetji
Aoli shisa angudak liasü.

Ayong nungi tzü yimjen ayim medem,
Nü shisa alima asoshi meyimtem
Ao, English, Hebrew, Greek, Latin, French,
German, Assamese, Sanskrit, Syriac, Urdu.
Item oshitem junga metetsang, na
Oh! ozü Aoli kaketnang.

Takoktsü ka asübo
Na iba akumli lima nungi pilaa oaka,
Ne ashi-metettetemi ozüi rizünga yulasüng!
Saka nai item ajakji bener oadok nung, ozü akoksa ati.

Laishiba tera nungi metetsang,
Oh! ozüi Ao laishiba azüngdang,
Ne mapatem bilemteter ani.
Laishiba nung olasü aser oyim amshiyim
Merijang ter tema nai zülutsüba ozüi anogoshi azünger.

Iba putu nung na ama ka mali asübo
Asen Aor Laishiba azüngyim koba jenjang nung lila?
Ya atangji nü nüken-nützü alangzük-ogo.
Yongji asen Ao Mungdang-i nü mapa alang nungu
LAISHIR TEBUTI odangbo jatsü masü no!!!

Nüng-toko shi-saa-ashir ka ama mesüi,
Kibong khuret ajemalua abensang,
Oh! ozü tsürapur, tesayur, aser tetuyur,
Küm metsür pungu rentetakasa
Asen kidang na mali onok rongjenseter.

Tsüngremi Abraham den tembar ayim medem,
Pai na saklok nung, Tsüngrem tembar
Prof. Renthly Keitzar ta ajatsü talang.
Ne sayutsüngi O taneb
Joko ozü-i alima nung ngutima?

Na ozü dangi kendanga meyipa arula sang ta,
Küm metsür pungu tejakdang na akumli aliba
Tanü ozü nüklai arua na asüym nung penzür.
Aolisanger ajak tejak shimaker lirji,
Aya! Alimai na amadoktetdi ma?
Aoli sanger rongnungi
Iba putu nung alir süaka
Tarutsü kümtem nung süaka
Na ama sotetjang ta ozü sarasadem.
Amen

AO OSHI ANGAZÜKDAK:**TANÜ ANGAZÜKTSÜBA OJANG**

Tila

(adj) tulu masü (small)

* Tila tanurtemi ozü tila ka pua bener aru.

Tilangutsü

(n) nisung tenük agi angutsü makokba iba oset amshia repranger (microscope)

* Kaketreju nung Science agidang microscope amshia sayur.



Tir Yimym

OLONG PAITEP # 7287

1		2		3		4	5		
				6					7
		8							
9				10		11			
			12					13	
						14			
16						17			

TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7286 TELANGZÜBA**TIPIEN :**

2. Bangsemo, 6. Tiptem, 8. Jen,
9. Talila, 11. Aren, 12. Tzübo,
14. Alia, 16. Angati, 17. Odi,
18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,
5. Milen, 7. Tulu, 10. Laza, 11. Aben,
12. Tiyong, 13. Ajizük, 14. Aitsü,
15. Tasa, 16. Aina.

NAI-A YA METETTER

Kazakhstan nunger Yernur Zhasuzak-i kor ana ma nung noktaker kilometer 2 tashi aoba World Book of Records aser Kazakhstan Book of Records nung züluogo.

Zhasuzak-i küm asem tashi equestrian sports practice süa arur aser iba otsü yanglutsü atema pai ita asem tashi training agiyonga aru. September 23, 2025 nü pai kor ana ma nung noktaker 60 kilometers per hour speed nung kilometre 2 tashi oteta otsü tasen yangluogo.

Chakma-Hajong nungeri ST meshiba magizüker: ACDSU

Guwahati, September 30, 2025 (Agencies): Arunachal Pradesh nung tawa Chakma aser Hajong nungeri Scheduled Tribe (ST) jenjang meshiba ya tim masü, temeten kecha mali aser magizüker ta All Changlang District Students' Union (ACDSU)-i metetdaksüogo.

Parnok nem iba ya agütsüra state nung lisopurtem temetentem, maitsü aser temzüng kübok tashi agüja aliba nung timtem ajurutsü ta ACDSU-i ashi.

Arunachal Pradesh nung lisopur nem constitutional protections agütsüba ya non-indigenous communities nem magütsütsüla ta parnok nenshi.

September 26 nü Diyun nung Joint Action Committee (JAC)-i referendum rally ka ayonga agiba atema ACDSU-i iba sangdong agütsü. JAC nung Chakma aser Hajong teloktem dena lir.

ACDSU-isa political party tem, teloktem aser kijatemi tim masüba takhangba pusema menungittsü metetdaksüogo.

State sorkar aser bangdak ketdangpurtemi lisopur sobaiba, lokti aser yimtenren temetentem kümzüka ayutsüla aser temzüng lateta aliba ama benshitsüla ta ACDSU-isa metetdaksüogo.

Office of the LONGJANG LONGKUMER KIDONG TELUNGJEM

Mokokchung : Nagaland

TENÜNGSANG AGÜTSÜR

Longjang Longkumer Kidong Telungjem-i Rev. L. Tarep Longkumer aser Late Talipokla Imchen na jabaso **Rev. Tiatoshi Longkumer**, Executive Secretary, Nagaland Police Baptist Churches Association (NPBCA), pai Martin Luther Christian University, Shillong nungi **"Theology and Religious Studies"** nung PhD (doctorate) ngutetba asoshi tenüngsang agütsür.

Tsüngremi pa taküm, kibong aser tenzüka wadang nung maneni moajangma.

Sd/-
Imtisowa Longkumer,
President.

Sd/-
Nungsangmanen Longkumer,
Secretary.



Assam Rifles-i Mizoram nung prangpong-shibelener 3 apu

Aizawl, September 30, 2025

(Agencies): Assam Rifles sepaitemi Mizoram kübok Saiha district nung prangpong-injang shibelener asem puogo.

Parnok ya Myanmar nungi lir aser parnok ket nungi prangpong-injang aika ngutetogo.

Tuipang village yimtsüng nungi kilometer 7 pilar Tuipang-Zawngling road nung ajungbena garitem mita aodang parnok apu.

AR sepaitemi checkpoint nung mena alidang China nung yangluba Kenbo motorbikes asem aruba mita reprang.

"Mezüngbo parnok ya senzusenbongertem ama dang reprang. Ajisüaka mita reprangdang 12-gauge shotgun cartridges 580 rounds, air rifles 6, illuminated optical scope, aser 15,000 rounds bena aliba angu" ta ketdangsür kati ashi.

Prangpong-injangtem dak alia AR sepaitemisa Myanmarese areca nuts, tobacco tins, liquor, silicon carbide, aser Myanmar

sen bena aliba angu.

Par asem ya Biehmo (28), Feithaisa (33), aser Laibawi (37) nunger ta jangjaogo aser parnok ajak Myanmar kübok Chin State nungi lir.

Assam Rifles sepaitemi par asem den apuba ajak Tuipang Police Station ket nung agütsüogo.

Myanmar kübok Chin State ya ozüng alema prangpong-injang, drugs aser arem shirurtem shibelendak tongti ka kümogo.

Chin state nungi Mizoram kübok arrtsülen aliba district 6-Champhai, Siaha, Lawngtlai, Hnahthial, Saitual, aser Serchhip adena shibelener.

Shibeleneritemi item district tem ajanga methamphetamine tablets, heroin, tapoktsütem, arem shiruru aser tanga osettem belener.

Mizoram nungi Assam aser Tripura ajanga India kübok tesem balala aser Bangladesh-i shibelener.

GOVERNMENT OF NAGALAND

INVESTMENT DEVELOPMENT AUTHORITY OF NAGALAND (IDAN)

NAGALAND SKILL & ENTREPRENEURSHIP DEVELOPMENT MISSION (NSEDMD) PROJECT MANAGEMENT UNIT (PMU)

No. NSEDMD-PMU/ESTT-1/1/2025

Kohima, dated the 30th September, 2025.

NOTIFICATION

In pursuance of the NSEDMD Advertisement no.NSEDMD-PMU/ESTT-2/1/2025 dated Kohima the 18th July 2025 and subsequent to the shortlisting by the Screening Committee and conduct of interview on the 25th& 26th September 2025; on the basis of the marks obtained in the interview and practical test for the post of Monitoring, Evaluation, Placement& Grievance Redressal Associate, the PMU-NSEDMD, IDAN is pleased to declare the results for the following positions as advertised.

Selected Candidates

Sl. No.	Name of Position	Candidate Code	Name
1	Mission & Training Coordinator	NSEDMD/2025/104	NUKHOLO SWURO
2	Mobiliser / IEC Associate	NSEDMD/2025/113	HOLILA SANGTAM
3	Convergence & Credit Associate	NSEDMD/2025/140	ESTHER QUINKER
4	Entrepreneurship Development Counsellor	NSEDMD/2025/124	IMTISUNUP LONGCHAR
5	Monitoring, Evaluation, Placement& Grievance Redressal Associate	NSEDMD/2025/142	BENDANGRENLA JAMIR

Waiting list

Sl. No.	Name of Position	Candidate Code	Name
1	Mission & Training Coordinator	NSEDMD/2025/101	ALNO KENNAO
2	Mobilise / IEC Associate	NSEDMD/2025/112	KHODINU KENNAO
3	Convergence & Credit Associate	NSEDMD/2025/133	RITSULA
4	Entrepreneurship Development Counsellor	NSEDMD/2025/127	VIZOTUO SOTHU
5	Monitoring, Evaluation, Placement& Grievance Redressal Associate	NSEDMD/2025/148	SEHUKHO DAWHUO

Note:

1. Non -AcceptanceLetterby any selected candidate may be submitted, in application format, via email to nsedm.gon@gmail.comon or before7th October, 2025
2. The selected candidates are directed to submit self-attested photocopies of all Academic certificates/ Documents/ NOC along with Acceptance Letterto the Office of the Project Manager (I/C), NSEDMD, IDANlatest by 12:30 PM of8th October, 2025.

Sd/- MERIPENI NGULLIE
PROJECT LEAD, PMU- NSEDMD

OFFICE OF THE
NAGALAND LOKAYUKTA
KOHIMA
ADVERTISEMENT

// Dated Kohima, the September 2025

NO.NL/LOK/ESTT-24/2025 Applications are hereby invited from amongst the eligible candidates for filling up the under mentioned posts of Driver (Non-Gazetted) outside the purview of NPSC/ NSSB in the office of the Nagaland Lokayukta, Kohima. This has the clearance of the P&AR Department, vide U.O. No. 661 dated. 02.09.2024, Finance Department concurrence vide RFC/ESTT.NO.15/2 dated. 10.09.2024 and P&AR approval vide NO.PER/VIG/1/1/2001dated 10th September 2024.

Item No.	Name of the post	No. of Post(s)	Pay Matrix Level	Remarks
1	2	3	4	5
1	Driver	2 (Two) Post	Level-3	1 Post reserved for BT (Konyak)

1. Minimum educational qualification should be class-8 passed.
2. The minimum age of candidates shall not be less than 21 years as on the day of the publication of this advertisement and not more than 32 years of age as on the day of the publication of this advertisement. The relaxation of upper age limit will be governed by the existing policy of the State Government, including those relating to serving State Government employees issued vide P&AR O.M. No. AR/GEN-6/7/2024/A/601 dated 15.10.2024.
3. The reservation of seat shall be as per the existing policy of the State Government.
4. In-service candidates should produce "No Objection Certificate" duly counter signed by the concerned Head of Department with name & office seal, along with initial date of appointment.
5. Eligible candidate(s) are to submit their application with required documents (Driving License (LMV/Heavy) / Aadhar card / Educational certificates / ST / Indigenous certificate / Backward tribe certificate if any / Birth certificate along with 2 (two) recent passport photos / employment exchange card/experience certificate if any) to the Establishment Branch, Nagaland Lokayukta, Kohima during office hours.
6. Issue of application form shall be w.e.f 8th October, 2025 to 31st October, 2025.
7. Submission of application form shall be from the date of issue of application forms till 5th November, 2025. Application(s) received after the last date shall not be entertained.
8. Admit Card shall be issued on the spot to the eligible applicants after verification of their documents. Incomplete documents or expired driving license and employment exchange card / learners driving license shall be summarily rejected.
9. Candidates are required to submit Rs. 200/- (two hundred) as examination fee at the time of form submission.
10. Date, Time and Venue for the said recruitment shall be notified at a later date through the local dailies and no separate calling letters will be issued to the candidates.

Sd/-
(ARIKUMBA) NCS
Secretary
Nagaland Lokayukta, Kohima

GOVERNMENT OF NAGALAND
NAGALAND SKILL & ENTREPRENEURSHIP DEVELOPMENT MISSION (NSEDM)
INVESTMENT DEVELOPMENT AUTHORITY NAGALAND (IDAN)
INVITATION OF EXPRESSION OF INTEREST (EOI) FOR TRAINING PARTNERS

The Nagaland Skill & Entrepreneurship Development Mission (NSEDM) invites Expression of Interest (Eoi) from competent and experienced Training Partners (TPs) to deliver high-quality, industry-relevant skill development training to the youth of Nagaland.

Interested institutions/organizations should have the capability and experience to conduct training in the following trades:

- Driving, drone technology, data analytics, project management, geriatric/ home-based care, GST filing, local Naga culinary, heavy vehicle operator & repair, child care services
- Masonry & tiling, electrification& plumbing (specifically for Eastern Districts)

Eligibility Criteria for Applicants:

1. Must be an independent legal entity registered in India.
2. Private Educational Institutions recognized by UGC, NCVT, AICTE, MHRD, MCI, or any similar statutory organization.
3. National Skill Development Corporation (NSDC)/Sector Skill Council (SSC) affiliated training providers.
4. Training Service Providers (company/firm/NGO/trust/society) must meet the following:

● At least three years of experience in providing skill development training.

● Trained and placed a minimum of 200 candidates in the last three years.

● Experience in conducting training under a Government of India or Nagaland state scheme.

● Meet the standard curricula as per NCVT/National Skill Qualification Framework (NSQF) guidelines.

● Have a permanent or leased infrastructure in Nagaland.

Application Process:

- Eligible and interested parties are requested to submit their detailed proposals including cost norms and all supporting documents, that demonstrate their capability and experience in one or all the mentioned trades.
- The Eoi must be submitted either to the Office or via email at nsedm.gon@gmail.comby 7th October at 2:00 PM. (1 week from the date of advertisement)

Contact for Submission and Queries : Project Management Unit, NSEDM Investment Development Authority of Nagaland (IDAN) 1st Floor, Capital Convention Center, Kohima- 797001 Phone: +91 69094 65902 (9:00 AM - 5:00 PM) Email: nsedm.gon@gmail.com

Sd/- (MERIPENINGULLIE)
PROJECT LEAD, NSEDM, PMU

KIBONG KÜMER KÜM 50 AJUNGBA TEPELA



Temeim Mama aser Papa, Kibong kümer küm 50 tashi Tsüngremer taochi aser temoatsü tulu, anema aliba den taküm tajung moaja iba alizüng tongtetba asoshi teyanglur Tsüngrem tenüng kanga asanger. Maneni anema aliba taküm tajung den arishi talang moajangni ta Jala, Jabaso, Semchirtem aser Anük Apang ajaki sarasademtsür.

Happy 50th Wedding Anniversary to our beloved Mama and Papa
"Mr & Mrs. Nokdang Jamir" (Kangtsung)

Teti dang meima aliba
Jala, Jabaso, Semchirtem aser Anük Apang.

Office of the
Imrong Youths' Association
Longkhum: Nagaland

TENÜNGSANG AGÜTSÜR

Imrong Youths' Association Longkhum züngsem nungi Sb. Tongtisangba Longchar, S/o Lt. Nokyu Longchar & Mrs. Moalemla, pai NSSB tatidang nung Assistant Fishery Inspector under Fisheries & Aquatic Resources Department jenjang ngutetba asoshi pelaba den tenüngsang tulu agütsür.

Tarutsü anogotem nung pa taküm aser tenzükbä wadang Tsüngremi maneni moajangma.

Sd/-
Mamungsang
President, IYA

Sd/-
Sakutila Longchar
General Secretary, IYA

Quetta nung Pakistan paramilitary
forces HQ kima nisung 10 pokset

Islamabad, Rongjui/

September 30 (Agencies):

Quetta nung Pakistan indang paramilitary security forces headquarters kima gari nung bomb enoka bener aru pokdaksüba sülen nisung 10 pokset aser 30 yiruo, ta ketdangsürtemi metetdaksü.

Police-i ashiba agi, telungpur trok gari nungi alua sepaitem den khatap tenzüc aser mapang tatsüka lir bomb ya pokdakja liasü, ta Associated Press-i metetdaksü. Headquarters amakterem ajak tepsetogo.

Bomb ya kanga sashia apok aser mile aika pilar alirtemia angashia liasü. Bomb apokba sülen ambulance tem Frontier Constabulary jakdang iba tesem yagi aritepa ao aser teküzmükertemi yirur alirtem mozükitemi anir oa liasü.

Gari apokba indang video tem ajanga gari ka paramilitary forces' compound jakdang anenba aser iba sülen bomb apokba sayuogo. Bomb apokba

sülen prangbong ola angashiogo aser bomb apokba tesem anasa aliba kitem nung kichiba raksa liasü. Iba tesem anasa aliba garia kar raksaba video tem ajangasa sayuogo.

Mohammad Usman, shiba paramilitary HQ anasa alir, pai ashiba agi, bomb apokba yagi kiyong ajunga anakshitsü. "Ozüi kidang kichiba raksa aser kia shilem kabo raksaogo. Ajisüaka onok kümzüka lir aser iba atema tsüngrem tenüng asadanger," ta pai ashi.

Iba bomb pokdaksüba indang telok kati danga nangzüka mali, saka bomb ya nüjiso bushiba telungpur teloktem mapa asütsü ta temulung melemi bilemer, shirnoki taoba mapanga Balochistan kübok tesem balala nung civilian aser sepaitem makogo.

Pakistan Ato Kilonser Shehbaz Sharif aser tir Asif Ali Zardari natia iba tesem amakba aitsüogo aser kanga kara telangzüba agütsüba atema security force tem nem tenüngsang agüja liasü.

Balochistan chief minister Sarfraz Bugti-i iba tatalokba ya aitsüogo aser ashiba agi, security force temi iba tesem amaker par pezüprongla tepsetogo.

Hopta ishika tejakdanga nationalist party pusemertem rally ka tembanger senshiba mapang pei temang nung bomb alenoker pokdaksür kati Quetta anasa stadium ka kima bomb pokdakja nisung 13 tepset aser 30 yiruja liasü.

Indonesia nung school ka chirepa nisung asem asü

Jakarta, Rongjui/September

30 (Agencies): Indonesia kübok East Java province nung Islamic boarding school ka chirepba sülen kaketshir asem tepset aser aika samar bushidar, ta ketdangsürtemi ashi.

National Search and Rescue Agency tekolakba Mohammad Syafii-i ashiba agi, Mongolbarnü 12:30 tashi nung lendong agi kongshir alirji parnok 102 lir, kong teküzmük 99 aser asür

3 densema lir.

Ki chirepba nung sabanga alitsü ta bilemba nisung 38 bushiba mapang ka lir, ta National Agency for Disaster Management-i ashi.

Ki chireper aliba nungi nisung terka kümzükogo aser nisung 91 jenteta liasü, ta disaster management agency-i ashi.

Lendong nung yirur netertenet temang anepalutsü atema mozüki balalai anirogo, ta

agency yagisa metedaksü.

Agency-isa, iba tatalokba ajanga construction safety standards ajang ajanga benoka inyaksangshitsü nüngdakba sayur ta ashi.

"Tarutsü nung iba amala lendong majurutsü atema nüburtem aser multistorey building achaayanger dang ki asüba mapang technical supervision agitsü mepeshir," ta kasa sangdong ajanga

metetdaksü.

Kasa mapang nung Indonesia's National Search and Rescue Agency-ibo, ki chirepba ajanga kaketshir 100 dak kongshi aser parnok rongnung ka dang taküm lia ngutetogo, ta shia liasü.

Sidoarjo, East Java nung Al-Khoziny Islamic Boarding School ya Hombarnü 3 ako nung kaketshirtem sarasadem atema adenshir aliba mapang chirep.

28buba Inter District & State TT C'ship tenzükogo



Kohima, Rongjui/September 30 (TYO): Nagaland Table Tennis Association-i ayongzüka Indoor TT Stadium, Kohima nung 28buba Inter-District aser State Table Tennis Championship September 30 nü tenzükogo.

Sentong nung Minister for Power and Parliamentary Affairs, K. G. Kenye alakteta

jaoker liasü aser pai Nagaland nung table tennis asaya ajungkettsü atema sorkar bendanga agütsür aliba metetdaksü. Kenye-isa, küm 40 tejakdang mezünpurtemi state nung iba asaya mezüng benoka asayaba indang lemsatepa parnok nem tenüngsang agütsü.

Kenye-i, Olympic nung

masayaba asayatem senotsü teyari agüja nongita arur saka table tennis yabo Olympic nung asayaba asaya ka lir saka tangar dang nungi atsüngzüka lir, ta ashi.

Chief Minister Neiphiu Rio aser state sorkar tenüng nung pai, national aser international jenjang nung asayatsüsa asayatem anitettsü asoshi

sorkari lenmang bushitsü aser table tennis asaya ajungmesotsü tenangzüka agütsü.

Minister-isa lanur asayatem dang temulungtetba tulu nung meranga asayatsü ajungshia liasü.

Taküm iba asayamung nung Kohima, Mokokchung, Dimapur, Phek, Wokha, Shamator, Kiphire, Mon, Meluri,

Niuland, Peren, Chumoykedima aser Tuensang nungi asayartemi shilem shidar, koba October 3 nü tembangtsü.

Asayartem ajak senteper tebur 114 aser tetsür 29 ta asayar 143, Under 15 Girls, Under 17 Girls, under 13 Boys, Under 15 Boys, Under 17 Boys, Men's Singles, Mens Double, 50+ Mens, 40 + Mens, Mixed Doubles aser Team Event nung shilem agidar.

Asayamung lapokba sentong ya NTTA Information & Publicity Secretary Vincent Belho lenisüba nung agi aser Associate Pastor Youth SABCK Kohima, Tovi Shohe-i sarasademer tenzüka liasü. Kasa mapang nung Vitho Neikha-i tir o jembia liasü.

NSF MM Trophy: Kuki United-i takok angu



Kohima, Rongjui/September 30 (TYO): Naga Students Federation aser Angami Students Union nati ayongzüka NSF Martyrs Memorial Trophy nung September 30 nü Kuki United-i asaya koka pre-quarter finals-i iogo.

Chumoukedima Football Stadium nung asaya nung Kuki

United-i goal 5-1 agi Damokles FC Medziphema koka liasü.

Seivanglen Kuki-i goal ana, Lunaldo, Letgoulal aser Paonaldo Kuki nungeri goal kaka idakja idaktsü.

Letgoulal-i own goal ka idaktsüba agi Damokles FC Medziphema-ia goal ka bo idaktsü.

Kuki United FC nungi Lunaldo nem Player of match naroküm patron Thejavizo Nakhro, Revenue Officer Chumoukedima-i agütsü.

October 1 nü asaya:

Chumoukedima FS Anal Lenruwl Tangpi (Manipur) vs Jakhama Youth Organisations.

Alzarri Joseph India den Test asayamung nung masayatettsü



Rongjui/September 30, 2025 (Agencies): West Indies' team India den Test asaya ana asayatsü aliba nung Alzarri Joseph masayatettsü. Pa teberem nung timtem aliba ajanga masayatettsüsa kümogo.

Joseph-i teberem nung timtem aliba indang ashishi aser scan agiba sülen taoba mapang yirur aliba ka yirushiba nguteta liasü.

CWI-i Hombarnü sangdong ka ajanga ashiba agi, Jason Holder shiba tang UAE nung Nepal den asaya aliba T20 asayamung nung asayadar, pai Joseph melenas asayatsü memulung, kechiyong pa temang anepalutsü atema jelia sentong yanglur lir.

Anungji West Indies-i, Joseph melenas left-arm seamer Jediah Blades team nung züngoksemogo. Arishi küm 23 tain Blades-a UAE nung oa lir aser pa Mongolbarnü tasembuba T20I asayaba sülen Test squad nung adentsü.

Blades ua Test nung tang tashi nung khen danga asaya mali, saka pa linük tenüng nungi ODI asem aser T20I pezü nungbo asayaogo. First class

asaya 13 nung pai wicket 35 agir lir aser pa indang average 35.91 asütsü.

Joseph masayatettsüsa akümba ajanga West Indies' pace attack kanga tashi meiti kümogo. Taoba hopta Shamar Joseph-a yiruba ajanga seam-bowling allrounder Johann Layne-i melena liasü, shiba tang mezüngbuba asayatsü lir. Seam-bowler tem rongnung Jayden Seales dang Test ter dak timba nung asayar lir. Spinner tem rongnung Jomel Warrican, Khary Pierre aser captain Roston Chase nunger densema lir.

India aser West Indies' na mezüngbuba Test asaya October 1 nü Ahmedabad nung tenzüktsü.

India Test series atema West Indies squad:

Roston Chase (capt), Jomel Warrican (vice-capt), Kevlon Anderson, Alick Athanaze, John Campbell, Tagenarine Chanderpaul, Justin Greaves, Shai Hope, Tevin Imlach, Johann Layne, Jediah Blades, Brandon King, Anderson Phillip, Khary Pierre, Jayden Seales.

Dinesh Karthik Sharjah Warriorz nung denogo

Rongjui/September 30, 2025 (Agencies): Mezüngbuba International League T20 (ILT20) player auction magi tsünga Sharjah Warriorz puri India nunger asayar tejen wicketkeeper-batter Dinesh Karthik anisemogo.

Arishi küm 40 tain asayar yagi JP Duminy-i coach asüba team nung ya Sri Lanka nunger asayar Kusal Mendis melenogo. Pa ya tajangshiba aika bena aliba asayar ka aser T20 cricket nung finisher tem rongnung tajungtiba ka lir.

Karthik ya 2007 T20 World Cup aser 2013 Champions Trophy akokba India team nung densema liasü aser Mumbai Indians nungi asayaba mapang 2013 küm IPL-a kokogo. Tawa pa Royal Challengers Bengaluru (RCB) indang batting coach liasü aser parnoki 2025 küm IPL kokogo. RCB nung pa Tim David den inyakogo aser tang Sharjah nunga külemi inyaktsü.

Karthik-i tang tashi nung T20 asaya 412 asayar lir aser iba mapang strike rate 136.66 nung



pai run 7,437 yanglu aser half century 35 yanglur lir. India tenüng nungi pa T20Is 60 nung asayaogo. Team nung pa adenba ajanga Sharjah Warriorz pur tashi itshitsütsü amanger, kong captain Tim Southee, Sikandar Raza, Johnson Charles, Tom Kohler-Cadmore, aser Saurabh Netravalkar nunger ajak densema lir.

Team nung adenba indang jembiba mapang Karthik-i, "ILT20 asayamung atema ni Sharjah Warriorz team nung adenba atema kanga pelar. Parnok takok angutsü atema jangraba team lanu ka ta ni meteta lir aser ni idaki adenba atema pelar. Sharjah ya nüngtugu stadium tem rongnung

ka lir aser ajaki idaki asayaner, aser Sharjah Warriorz franchise nung adenba ya nükjiding atalokba ka lir," ta ashi.

Head coach JP Duminy-ia pa anisemba atema pelaba lemsatepogo. "Dinesh Karthik ya tajangshiba aika bener aliba asayar ka aser T20 cricket asaya nung pa kanga tesangra lir aser pa taruba asayamung atema onok team nung adenba atema kanga pelar. Pai batting kanga junga amaneba, pa yimya aser tajangshiba aika bena aliba ajanga asayamung asayayonga aodang lanur asayartem kanga ajangzüksü," ta pai ashi.

Sharjah Warriorz COO Kshemal Waingankar-ia, "Dinesh Karthik team nung adenba atema kanga pelar, shiba India nung white-ball cricket asaya nung nüngtugu asayar ka lir. Pa adenba ajanga Warriorz pur kanga tashi ita kümdaktsütsü," ta ashi.

ILT20 Season 4 ya taküm küm tatemlen asayatsü lir aser team nung Karthik aniokba ajanga Sharjah Warriorz pur asayamung akoktsü imlar rongnung ka kümdaktsütsü.

BILEMDANGANG

"Renema alirtemi tia tensa ajak ajangtettsü."